



### **Kommunik aqqissuusseqqinneq nalilersortariaqalenera pillugu apequteqaat aallaavigalugu oqallisissiaq.**

(Inatsisartunut ilaasortaq Aqqalu C. Jerimiassen)

Aqqalu C Jerimiassen oqallisissiaqkut qaqtannut soqutiginaqisumut qujanaq.

Kommunenik aqqissuussineq pillugu nalilersueqqittariaqalenermik qaqtisnermi illoqarfiit kommunellu ataasiakkaat eqqaaneqaraluartut, tamanna oqaaseqaatissatsinni uani qitiutissanngilarput.

Qitiutinniarpaput inuit ataasiakkaat sumiluunniit najugaqaraluarunik sunniuteqaqataanermikkut inuiaqatigiinni oqartussaaqataanerisa qulakkeertuarnissaat ilutigisaanillu kommunet karsianniit atugassanngortinneqartut, inatsisitigut aalajangersakkat kommuninilu qinikkat siunnerfii naapertorlugit, innuttaasunut annertunerpaamik iluaqutissanngortinneqarnissaat.

2007-imi inimi maani isersimasut aalajangerpaat kommunet 18-it sisamaannanngortinneqassasut. Innuttaasunik kiffartuussinerup pitsaanerusup eqaannerusullu pilersinneqarnissaa siunnerfigineqarpoq. Inatsisinik illersorneqarnermik misigisimanerup qaffanneqarnissaa siunertaavoq. Innuttaasut pisortanut saaffiginnittarnerat oqinnerulersikkumaneqarpoq.

Kommunet ikilisinneqarnerat ajortuinnaangilaq isornartuinnaanani. Kiffartuunneqanermi akit assigiissaarneqanerat arlalitsigut inissinneqarpoq, tamatullu kiffartuunneqaneq assigiiartumik periuseqarluni ingerlanneqaleriartorpoq. Kommunet ikilisarneqareernerata kingorna naliliinermi ingerlanneqartumi tamanna aamma oqariartuutigineqarpoq. Innuttaasut saaffiginnittarneranni periarfissat assigiissarneqarput, taamaasilluni periuitsit assigiiartut – taamaatumillu ilisarnartut - sumiikkaluaraanniluunniit pilersinneqarlutik.

Kommunet nutaaliornermikkut aqutseriaatsimik aqqissuussaaneermillu naleqqusaanermikkut pilersitsisut arlalinngoriartorput. Sapinngisamik aningaasat – amerliartunngitsut – pitsaanerpaamik innuttaasunut tutsinneqarnissaat inuiaqatigiinnilu sumi tamaniittuni iluaqutissanngortinnissaat pisinnaaqqullugu.

## **[Kisitsisit]**

Isiginngitsuusaaginnaarsinnaanngisagulli kisitsisit takutitaat. Saaffiginnissutsit aatsaat taama amerlatigisut 2019-imi Ombudsmandimut apuunneqarput, taakku amerlanersaat kommunit sullissinerat / aalajangiinerat pillugu naammagittaalliutaallutik. Inuit innarluutillit Oqaaseqartartuannut saaffiginnissutit nalilersorneqarmata takusinnaavarput taakku amerlanersaat tassaasut inatsisitigut pisinnaatitaaffioreeraluartut kommunenit naammassinneqartarsimangitsut pillugit innuttaasut saaffiginnissutaat. Meeqqat pisinnaatitaaffiinik illersuisup ukiumoortumik nalunaarusiarisartagaatigut uppersarsarneqarpoq saaffiginnissutsit amerlasuut pisortanit, amerlasuutigullu kommunenit, inatsisit naapertorlugit naammassinneqartarsimangitsut.

Ilinniagaqarsimasut amigaataanerat tusarnartaanngilaq. Sivikitsuinnarmik sulereerlutik ukiup ataatsip ingerlanerani inoqarfimmut allamut nuuttartut tusarnartaanngillat. Qitiusumik naatsorsorneqanngilaq, taamaattumillu malinnaaffigineqarsinnaanani, meeqqat atuarfiini pisortaqatigiit qanoq akulikitsigisumik taarsertarnerisut. Qitiusumik naatsorsorneqanngilaq vikarit atorlugit meeqqat atuarfianni atuartsineq isumagineqartarnerisooq, taamalu meeqqat atuarfiat pillugu inatsisip siunertaa naapertorlugu meeqqanik atuartsineq ingerlanerarsooq inimi maani imaaliinnarlugu qulakkeersinnaanngilarput.

Inatsisiliat arlallit kommunenut suliasanik tunniussinermi tunngaviusut inimi maani akuerineqartut siunertamik eqquutsitsisoqanngippat malitseqartitsisoqarnissaanik imaqanngillat.

Ineqarnermut oqartussaaffeqarneq kommunenut tunniunniarneqartoq pilersaarutaavoq. Inissianik aserfallatsaaliinissamut 12 milliarder kronit pisariqartinneqartut ilisimavarput. Inissiat attartortittakkat iluarsagassarujussuit kommunenit tiguneqarpata aningaasallu malinnaatinneqanngippata - taamalu kinguneranik pitsaanngitsumik ineqartitaaneq aqquसारनेqassappat - innuttaasut inatsisinik illersorneqartutut misigisimanerat innarlerneqassaaq, innarlerneqareersimangikkuni.

## **[Aqqissuusseriaaseq]**

Inatsisit inimi maani aalajangiiffigineqartut kommuneniillu atuuttassanngortinneqartut, meeqqat atuarfiinut, meeqqerivinnut, utoqqaat illuinut, allarpassuarnullu tunngaasuteqartut Nunatsinni sumiinnerput apeqqutaalluni kommunalbestyrelsellu assigiinngitsunik tallimanik periuseqarluni aqutsinerat pissutaalluni assigiinngissitaartumik atukkanik malitseqartarnera naapertuuppa? Aningaasanik aqutsinermut atugassat systemit kommunit amerlasusaat naapertorlugu amerlassusilerneqarnerat naapertuuppa? Ilinniartitsisut assigiinngitsunik neqeroorfigineqarlutik kommunenit pilerngunneqartarnerat naapertuuppa? Kommunemut akileraarutit assigiinngitsuunerat naapertuuppa?

Sumi tamani borgmesterilersunngikkaluarluta imaluunniit pisortarpassuarnik atorfinitsitsinnikkaluarluta innuttaasunut qanimut attaveqarneq akuutinneqanermillu misigisimatitsineq qanoq nukittorsarsinnaavarput, inoqarfiit ilaanni najugaqartut missukutaasutut – taamaattumillu sunniuteqaqataanngitsutut – misigisimasinnaanerata annikillisarumallugu akerlianilli demokratiip nukittorsarneqarnissaa angujumallugu.

Oqanngilagut kommunet atorunnaarsinneqassasut. Tassami innuttaasut qanimut peqatigalugit ingerlatsineq sunniuteqaqataanermik misigisimatitsisoq qulakkeertuartaasavarput, inatsisitigullu inimi maani aalajangiiffigineqartut innuttaaqataasunut assigiinngitsutigut iluaqutissanngorlugit atuuttussanngortinneqarnissaat minnerunngitsumik qulakkeerneqartussaalluni.

Aperisoqarsinnaavoq maannakkutut kommunet isikkoqartillugit aaqqissuuseri-aaseq aaqqiissutaanersoq pitsaanerpaaq Nunatsinni taamatut isikkulimmik nunaqariaaseqarfiusumut kisiartaalluni naapertuuttoq, imaluunniit allarlunarmik aqutseriaatsimik ujartuinissamut piffissaq manna iluatsillugu eqqartuinnissaq atussaneripput.

Virusip tunuluuttup nunarsuatsinni ajornartorsiutaanerata ajornartoortip-paatigut. Ajoraluartumik aqaguagu qaangernaviarunanngilarput. Akiuussutisamik nassaartoqarnissata tungaanut pissutsit ilisarimasimasagut nalunngisarisimasagullu uterfigeqqinnissaat uatserujussuusinnaavoq.

Aatsaat taama pisariaqartigileraluarpoq nuna tamakkerlugu ineriartortitsinissamut pilersaarut, ukiorpaalunngortuni suliarineqartarsimanngitsoq, imaluunniit manna aqqutigalugu saqqummiunneqartarsimanngitsoq. Nuna tamakkerlugu pilersaarut nukittorsagassanik aammalu nukittuumik inissimasunik suli ineri-sarneqarsinnaasunik tikkuussisoq siunnerfiliissaaq, kommunenuinnaanngitsoq aamma inimi maani aalajangersaasartunut, nunamik ataatsimut isiginninneq toqqammavigalugu.

Qulakkiigassaq tassaavoq innuttaasunik kiffartuussineq pitsaanerpaaq, inatsisitigut illersugaasutut innuttaasut misigisimajuarnerat, aammalu innuttaasut pisortanut saaffiginninnerminni pitsaanerpaamik eqaannerpaamillu kiffartuunneqartarnissaat. Tamannalu ingerlaavartumik nalilersorneqarnissaa pingaaruteqaqaaq, Inatsisartunut, Kommunenu, minnerunngitsumillu pineqartunut, tassalu innuttaasunut.

Qujanaq